

乾隆杭州府志

杭州府志卷一百五

人物十二 寓賢

唐虞

許由潁川陽城人寓武林山稽雷峰其遺跡也太平寰宇記許由葛洪皆隱此忘返故號稽雷史記箕山有許由塚箕山在河南嵩少間今昌化亦有箕山蓋由嘗遊覽于此故借其所隱以名之

萬歷舊志

按舊志寓賢首列許由正史竝無明文似不足信然見太平寰宇記卽不可謂無稽也舊志又載荀卿則不可考故刪之

漢

嚴光字子陵一名遵餘姚人少有高名與光武同學及光武卽位乃變名姓隱身不見帝思其賢乃令物色訪之後齊國上言有一男子披羊裘釣澤中帝疑其光乃備安車元纁遣使聘三反而後至車駕幸其館光卧不起帝曰咄咄子陵不可相助爲理耶光又眠不應除爲諫議大夫不屈乃耕于富春山後復徵不至年八十卒於家

後漢書本傳

南北朝

謝靈運安西將軍奕曾孫少好學博覽羣書文章之美爲江左第一襲封康樂公出爲永嘉太守郡有各山水素所

愛好遂肆意遊遨所至輒爲詩詠以致其意在那一周稱
疾去職移籍會稽有終焉之志

南史本傳

靈隱山畔有夢謝亭

晉杜明禪師爲謝靈運建靈運父舉之愛不能畜乃寄養
于杜明杜明夜夢東南有賢人相訪翼日靈運至遂建夢

謝亭一名客兒亭

西湖遊覽志

徐儀東海鄉人陵第三子少聰警以周易生舉高第爲秘
書郎出爲烏傷令正明初遷尚書殿中郎尋兼東宮學士
陳亾隱于錢塘之赭山

陳書本傳

徐孝克陵第三弟也少爲周易生有口辨能談元理旣長
徧通五經博覽史籍梁太清初起家爲太學博士性至孝

侯景亂京邑大饑孝克養母餽粥不能給薙髮爲沙門乞食以充給焉後歸俗居錢塘之佳義里與諸僧討論釋典遂通三論每日二時且講佛經晚講禮傳道俗受業者數百人天嘉中除郟令非其好也

陳書本傳

岑軻岑彭之後岑暉字公孝黨錮難起逃于江夏山中徙居吳郡生亮伯亮伯生軻吳會稽鄱陽太守六子寵昏安頌廣晏後徙鹽官十世孫善方梁起居舍人尚書長安公

唐書宰相世系表

唐

駱賓王義烏人七歲能賦詩除臨海丞鞅鞅不得志棄官

去徐敬業舉義署爲府屬爲敬業傳檄天下斥武后罪狀
后讀至一杯之上未乾六尺之孤安在矍然曰誰爲之或
以賓王對后曰宰相安得失此人敬業敗賓王亡命不知
所之中宗時詔求其文得數百篇唐書本傳敬業爲衡山僧賓
王乃落髮徧遊名山至靈隱本事詩

陸羽字鴻漸竟陵人以箠得漸之卷曰鴻漸于陸其羽可
用爲儀吉因以爲名氏上元初隱苕上自稱桑苧翁時人
方之接輿嘗寓靈隱山作二寺記曾鑿于石惜乎不傳舊錢

塘縣志

陸龜蒙字魯望少高放通六經大義尤明春秋舉進士一

不中往從湖州刺史張搏遊搏歷湖蘇二州辟以自佐
蒙多所論撰雖幽憂疾痛資無十日計不稍輟也嗜茶置
園顧渚山下歲取租茶自判品第不喜與流俗交雖造門
不肯見設蓬席齋束書茶竈筆床釣具往來時謂江湖散
人或號天隨子甫里先生

唐書本傳

嘗至靈隱晤丁飛作丁隱

君歌相贈

舊志

李源京洛人父愷死祿山之難源怨憤不仕不娶居惠林

寺三十年

西湖遊覽志

張祐字承吉貝州清河人稱張公子性高曠工詩

續通志

初

與徐凝同赴白居易杭州求解白試之以擬居首次祐祐

不服因太息歸自此罷舉

雲溪友議

五代

何溥越州人識雲氣善地理爲南唐僕射大夫國公掛冠
隱芙蓉山隱跡禪門不談僧話每誦道德經必曰真聖人
也孔子豈欺我哉今石屋嶺有祠

咸淳志

宋

潘閔字逍遙太谷人寓居錢塘通易詩春秋尤以詩知名
所交遊皆一時豪俊曹彬奏爲四門助教

兩浙名賢錄

崇寧間

武夷黃靜仕杭得闔詩十首刻之石爲之跋云放懷湖山
隨意吟咏詞翰飄然非俗手所可仰有逍遙集

郡齋讀書志

徐復字復之建州人初遊京師舉進士不中退而學易通
流行卦氣自筮知無祿遂無進取意游學淮浙間慶歷初
與布衣郭京俱召見命爲大理評事固以疾辭賜號冲晦
處士後居杭州十數年而卒

宋史本傳

李頎字粹老舉進士當得官棄去烏巾敝裘爲道人遍歷
湖湘間晚樂吳中山水之勝遂隱于臨安大滌洞天往來
茗溪之上遇名人勝士必與周旋善丹青間作小詩蘇軾
倅錢塘日粹老以幅卷作春山橫軸且書一首于後不通
姓名付樵者俟軾之出投之軾展卷視詩畫已奇之及問
樵者曰我負薪出市有一道人與我百錢令我呈此實不

知何人也軾益驚異之卽徧問西湖名僧輩知是粹老久之偶會于湖山僧舍相得甚喜軾乃和其詩云詩句對君難出手雲泉勸我早抽身其風致可見矣

春渚紀聞

按春渚記聞不載願里居但云舉進士攷杭州選舉無願名又云遍歷湖湘晚樂吳中山水必非杭之士著也故列寓賢卷中

晁補之字無咎濟州鉅野人父端友工于詩補之聰敏強記纔解事卽善屬文十七歲卽從父官杭州見山川風物之麗著七述以謁州通判蘇軾軾先欲有所賦讀之歎曰吾可以閣筆矣由是知名舉進士克國史編修實錄檢討

官還家葺歸來園號歸來子

宋史本傳

汪應辰字聖錫信州玉山人張九成之弟子也九成遭亂避居海昌應辰亦避難自遠來從初應辰登第時秦檜力主和議應辰上疏論檜大不悅遂請祠以歸以脩身講學爲事浩然之氣不爲稍屈九成謫邵州交遊皆絕應辰時加通問人皆危之趙鼎貶死朱崖應辰爲文祭之衛守章傑希檜意指應辰爲阿附死黨編鞠之得胡寅言乃寢檜又欲殺張浚事逮應辰檜死幸免

萬歷舊志

洪皓字光弼鄱陽人少有奇節登政和進士爲秀州司錄

大水皓白郡守發廩以糶浙東糶米過城下白守邀畱之

守不可皓曰願以一身易萬人命人感之切骨號洪佛子
建炎三年擢徽猷閣待制爲大金通問使至雲中尼雅滿
使仕劉豫皓曰萬里銜命不得奉兩宮南歸恨力不能磔
豫忍事之耶尼雅滿將殺之旁一將曰忠臣也爲之請得
流遞冷山二帝居五國城皓密遣人奏書金主問其名欲
以爲翰林學士皓力辭未幾金大赦許使人還鄉皓與張
邵朱弁竝遣還甯北中凡十五年忠義之名聞于天下

宋史
本皓全節歸朝見內殿求還鄉養母帝曰卿忠不忘君雖

蘇武不能過也豈可舍朕去因賜第于錢塘之葛嶺命迎

養其親

熒煌
事實

朱弁字少章徽州婺源人少穎悟讀書日數千言既冠入
太學新鄭聞見日廣靖康之亂家碎于賊南歸及淮甸會
高宗嗣統駐蹕揚州議遣使問安兩宮而士大夫無敢行
者遂奮身自獻詔補修武郎借吉州團練使爲通問副使
卽日與使者王倫同行至雲中遇尼雅滿說之尼雅滿不
聽使就館守之以兵弁復屢與書言用兵講和利害甚悉
紹興二年金忽遣宇文虛中來言和議可成當擇使副一
人詣元帥府受書還虛中欲二人探籌決去畱弁請使長
受書歸報已願暴骨外國遂畱金人百計迫之誓死不
屈嘗遣從者問行歸報北中虛實曰此不可失之時也十

三年和議成始得歸入見便殿極言時幾之不可失又獻金國所得六朝御容及宣和御書畫所述北方間見事狀帝高其節有進用意秦檜惡其言敵情奏以初補官易宣教郎直秘閣十七年應遷官檜沮之僅轉奏議郎以疾卒于臨安府白龜池之寓舍遺命歸葬不果權厝西湖上智果院忠義之士莫不哀之後四十年其從孫熹官浙中卜

葬錢塘縣積善峰下

萬歷舊志

范成大字致能吳郡人紹興二十四年進士第累遷著作佐郎除吏部郎官知處州隆興再講和失定受書之禮上嘗悔之遷成大起居郎假資政殿大學士充金國祈請信

使國書專求陵寢蓋泛使也上面諭受書事成大乞并載書中不從至燕山密草奏具受書式懷之入初進國書詞氣慷慨金君臣方傾聽成大忽奏曰兩朝旣爲叔姪而受書禮未稱臣有疏搢笏出之金主大駭曰此豈獻書處耶左右以笏標起之成大屹不動必欲書達旣而歸館所金主遣伴使宣旨取奏竟全節而歸除中書舍人累官吏部尚書叅知政事以病請閒進資政殿學士再領洞霄宮紹熙三年加大學士成大素有文名尤工于詩上嘗命陳俊卿擇文士掌內制俊卿以成大張震對宋史本傳居杭城棗木巷今巷西石湖橋因其號名橋也夢梁錄

李綱字伯紀邵武人政和初進士高宗朝官至宰相綱負天下之重望知有君父而不知有身知天下之有安危而而不知其身之有禍難爲相僅七十日而其忠誠義氣凜然動乎遠邇銳意恢復知無不言爲呂頤浩諸人所劾詔提舉洞霄至今祠祀

嘉靖臨安縣志

朱子字元晦婺源人紹興中進士歷煥章閣待制兼侍講寧宗時罷諫臣黃度因講畢奏疏極言四事忤韓侂胄帝方倚任侂胄乃出手批云憫卿耆艾恐難立講已除卿官觀在朝四十六日進講者七內引奏事者再頗見嚴憚至

是權倖媚嫉提舉洞霄至今祠祀

萬歷臨安縣志

按南宋時洞霄與嵩山崇福並爲宮觀之首以寵輔相
人臣去位者其以提舉洞霄宮起拜左相者亦有之然
名爲祠官實與投閑林下無異官志載祠官七十二人
郡志載三十二人賢奸混淆世次舛錯朱彝尊據正史
合之野錄另爲詮次頗稱詳核今載雜記門唯李忠定
朱文公俎豆長新勳名不改列之寓賢尤爲山川增重
云

趙師秀字紫芝號靈秀永嘉人嘗登科改官有清苑齋集

四朝詩選師秀旅寓杭州有終焉之志戀戀西湖以終其身西湖志

遊覽志

趙汝諲開封人曾祖士龍爲江南東路鈐轄李成寇淮南
圍九江士龍罵賊仰藥死贈武功大夫官二孫以承信郎
曾孫汝諲以乾道七年丞鹽官因家焉

萬曆舊志

木待問字蘊之永嘉人隆興元年廷對第一以宦遊嘗息

于寧後卜居城南遂名其里曰仁賢里

舊志

周輝字昭禮淮海人紹熙間居錢塘清波門之南嗜學工
文隱身不仕當世名公卿多折節下之而簡亢自高未嘗
報謝藏書萬卷父子自村師友撰清波雜志十二卷

兩浙名賢錄

孫惟信字季蕃仕宋光宗時棄官隱西湖又爲長短句好

藝花卉自號花翁家徒壁立無旦夕之儲彈琴嗜書晏如

也

西湖遊覽志

宋斌字文叔袁州人少從黃幹李燔登朱子之門學禁方嚴羈旅困阻年且八十矣臨安尹趙與權延之事以父行奏乞用旌禮布衣故事不報卒葬西湖與權歲一祭焉私

謚淳固先生

萬歷舊志

施岳字仲山吳人僑居武林能詞精于律呂

湖山勝槩

梁棟字隆吉其先湘州人父安道寓鄂州棟生于鄂弱冠登第初選寶應簿再調錢塘仁和尉一時聲名籍甚入元居武林守道安貧澹如也平居吟咏稿無存者門人問曰

先生何故不存稿答曰如吾詩堪傳人將有腹稿在

胡迥梁隆

吉詩集序

鄭震思肖父號鞠山翁淳祐間居西湖有水南半隱在長

橋作水南半隱記

舊西湖志

陳慤字公實父旦官國子助教自宣城徙杭之萬松嶺慤有文學一時名人如范元卿陸務觀辛棄疾咸與之遊論者謂其氣節度量有郭元振之風官至承事郎知餘姚縣復自杭徙諸暨陶朱里

墓碣

謝翱字臯羽福之長溪人倜儻有大節而獨行好脩刻厲憤激直欲起古人從之遊不忍混流俗意所不顧雖禹夫

莫回每慕屈平托興遠遊因自號晞髮子嘗爲文丞相客
聞天祥被執翹悲不能禁失聲哭桐江有子陵臺孤絕千
尺時天涼風急挾酒登其上設天祥主拜跪伏醉號慟乃
取竹如意擊石作楚歌招之歌闕竹石俱碎至元甲午來
家杭西湖上前代遺老咸詫見翺晚也

萬歷舊志

郭義重字處仁興化軍人早遊太學以操尚稱年四十餘
客錢塘徒跣奔母喪每一慟輒嘔血聚土爲墳手撼松柏
而廬其旁詔旌其閭後時奏召補官六十始婚以高年終

舊志

元

周密字公謹寶祐間爲義烏令入元不仕自號泗水潛夫
詩極典雅善畫得意輒自題其上

淨慈寺志

世居仁和癸辛街

與趙子昂仇仁近戴表元爲友詩文典雅所著有癸辛雜

志齊東野語諸書

舊志

虞集字伯生少不偶寓居錢塘

西湖遊覽志

集從草廬吳澄遊

大德初薦授大都路儒學教授累遷奎章閣侍書學士脩

經世大典進侍講學士至治大歷間宗廟朝廷之典冊公

卿大夫之碑版咸出其手粹然成一家言門人訂其在朝

應制歸田方外諸稿釐爲五十卷曰道園學古錄

元史集

寓餘杭闕石室書邵堯夫詩題曰邵庵

萬歷舊志

鮮于樞字伯機漁陽人樞爲浙江行省都事因居杭州風流儒雅與吳興趙子昂相伯仲遷太常簿子昂嘗觀其神虞伯生贊之曰歛風流裴劍之豪爲湖山圖史之樂翰墨鞅米薛而有餘風流擬晉宋而無忤是以吳興公運畫沙之錐刻希世之玉使千載之下眼識二妙于遐邇伯機之鶴死命瘞之西湖士大夫多有詩悼之

西湖遊覽志

趙孟堅字子固號彝齋宋諸王孫也脩雅博議善筆札工詩文酷嗜法書多藏三代以來金石名跡遇其合意時雖傾囊易之不靳也又善作梅竹往往得逃禪石室之妙于山水爲尤奇時人珍之襟度瀟爽有六朝諸賢風氣時比

之米南宮而子固亦自以爲不歎也嘗客行都會苜蒲節
周公謹偕一時好事者邀子固各携所藏買舟湖上相與
評賞飲酣子固脫帽以酒晞髮箕踞歌離騷傍若無人薄
暮入西村橋掠孤山艤棹茂樹間指林麓最幽處曰此真
洪谷子董北苑得意筆也鄰舟皆歎以爲真謫仙人

西湖遊覽

志

胡長孺字汲仲永康人少博學淹貫宋咸淳中以蔭入官
至元初由薦入翰林爲修撰出爲揚州教授遷建昌錄事
台州寧海簿長孺本儒者所至輒有神明之政階將仕郎
長山場司鹽丞以疾辭歸寓武林城中爲人光明俊偉明

于心學誘引後學不倦其文章頗爲時所知海內購求無
虛日鄉閭屢典文衡貴實賤華文風丕變年七十五卒著

有石塘文稿

萬歷舊志

陳柏字雲嶠泗州人性豪宕祖平章積金七屋不數年散
盡嘗爲侍儀舍人館閣諸老莫不折輩行與交其妻鐵太
保女也恃富貴近戚偶以一言驕之遂終身不見嘗被命
監鑄祭器於杭無錫倪元鎮慕其名求見之燕湖山羅設
甚至酒終爲別以一帖饋米百石柏舉巨觥顧倪曰吾在
京卽熟爾名云江南士清無與比其所以章章者以米沽
之也請從今日絕其氣節如此

輟耕錄

張翥字仲舉晉寧人父爲吏從征江南調安仁尉又爲杭州鈔庫使因家焉翥少豪放不羈好蹴鞠走馬不以家業屑意父憂之一旦改業閉門讀書因受業于李存又從仇遠學以詩文名一時累官翰林學士承旨所著有蛻庵集

忠義集

兩浙名賢錄

劉汶字師魯鄆王六世孫占籍錢塘以文章淑後進德行學術與劉濩齊名

浙江通志

劉濩字聲之莆田人占籍于杭與師魯以文行爲一時寓

賢之首

兩浙名賢錄

繆倫字叔彝東平人侍父宦游錢塘至正十六年淮兵寇

城執其父將殺之倫哀號乞免弗聽傾家資以贖又弗聽

乃自縛請代于是殺倫而釋其父

輟耕錄

龍廣寒江西人寓居錢塘挾預知之術游湖海間咸推爲異人又行服氣導引之法常佩小龜十數于身至晚仍解飼之事母至孝六月一日母生辰方舉觴爲壽忽見北窻下梅花一枝盛開遂稱之曰孝梅贈詩者甚多至治初卒年百有八歲猶童顏綠髮云

輟耕錄

貫雲石阿爾哈雅之孫父名貫只哥因以貫爲氏卜居鳳山門外名小雲石酸齋其號也有文武才折節讀書爲古文峭厲有法詩歌古樂府慷慨激烈士大夫樂從之遊少

用父蔭爲萬戶府達嚕噶齊乃讓與弟後以文行薦爲翰林侍講學士知制誥既又辭疾還江南詭姓名易服色賣藥錢塘市中人無有識之者

兩湖
塵談

邱世良字子正父璫由台州徙錢塘世良幼穎悟讀書過目輒解父喪奉母以居日益貧教授市中經傳子史百家之言靡不蒐究用薦爲海鹽州教授復學田千餘畝秩滿除杭州路教授既代授慶元路總管府知事世良所定文牘吏不敢舞文法爲奸仕終松江府同知所著有梯雲集

六卷隨筆六卷

萬歷
舊志

郭彥澤河南人少有氣節高自稱許有葛先生者神于醫

盡以其術授之避地武林自稱曰洛下遺民

萬歷舊志

揭傒斯字曼碩龍興富州人以薦授翰林國史編修官遷

翰林應奉累進侍講學士同知經筵至正初召修宋遼金

三史充總裁官卒諡文安

四朝詩選

學士溝在山南元時西湖

壘合好事者疏之以通小舟集賢學士揭曼碩祀南鎮弭

節葛嶺見而助焉因名學士溝曼碩自爲記

西湖遊覽志

薩都刺字天錫雁門人寓居武林博雅工詩文風流俊逸

而性好遊每風日晴美輒一肩一杖掛瓢笠腳踏雙不借走

兩山間凡深巖邃壑人跡所不到者無不窮其幽勝至得

意處輒就草坐徘徊終日不能去興至則發爲詩歌以品

題之今兩山多有遺墨而西湖十景詞尤膾炙人口後莫

知所終

兩浙名賢錄

黃公望字子久其父九十始得之曰黃公望子久矣因而名字焉號一峰又號大癡道人平江常熟人幼聰敏應神童科經史二氏九流之學無不通曉後隱于富春山水師

董源巨然晚年變其法自成一家

畫史會要

戴表元字帥初奉化人景定咸淳間初客杭見能詩人不一二數不必皆杭產也與金仁翁劉養源翁處靜輩商略樂府往往花朝月夕皆能自爲而自歌之表元從旁拊掌擊節稱善嘗自謂交之羣莫盛于杭大德戊戌嘉興顧伯

玉客于杭城東杭城之賢而文者皆與之遊而屈存博白
廷玉以立春前一日過廬清談劇飲甚適既少倦卽相與
循關垌步江臯眺太白錢鏐之荒墟弔陶朱子胥之遺跡

意氣蒼茫襟神飛竦

剡源
文鈔

郭昇字天錫京口人至大元年到杭州歇于施水坊橋梳
洗沈待詔之樓樓頗潔便於坐卧大抵杭城樓居相連自
有一種風韻出遊宗陽宮時裝塑未就次遊新宮佑聖觀
看擁壁二十四堵皆新畫也往湖上兜率寺見趙子昂學
士不遇訪吾子行求篆字子行寫篆字相送乃取玉簫吹

數闋

客杭
日記

楊子祥餘姚人父元和明春秋學子祥世其家卓犖有奇氣江萬里舉爲縣監稅輒棄去教授海濱學徒甚盛兵興避地西湖主牟應龍家時苗莩炎事世祖爲吏部尚書聞子祥賢欲致之不顧東遷遇鄧牧謝鄒方九里于臨安九里亦姚人相與弔古尋幽酌酒賦詩徜徉湖山間復有薦此數人者乃皆去歸其鄉而子祥歸姚杜門著書垂二十

年而卒

兩湖
塵談

邱克莊廣陵人至正壬寅大比江浙行省克莊用流寓例以詩經就試預選年甫三十識朗志果初居廣陵時天下承平一時貴遊子弟日事娛樂克莊家故饒于資獨從師

友窮經史以問學爲事及廣陵被兵一時謀人策士乘機
遇合以取富貴顧乃入庠序訓生徒取所入以自給可謂

士之卓然自立者

始豐
類稿

易貞字廷幹荊州人幼從父母避地來浙遂家焉貞天姿
粹美行甚謹飭選杭學弟子員出入學校非特不爲嬉戲
徵逐之事亦未始見其笑至矧怒至詈居恒每有不怡之
色人問之則曰貞從親至浙也日漸長大冀有所成立以
養父母今幸父猶強健而吾母竟棄不肖孤而去欲報無
地煢煢在疚恒讀大戴記至母沒而杯棬不能飲口澤之
氣存焉潸然出涕爰就母飲食起居之處顏之曰澤存

徐

夔澤存
室記

遂西臯不知其名元左丞相魯曾孫也占籍錢塘工文翰
有雅趣仕行省都事後棄官居西湖與張輿爲莫逆交子
宏洪武初選補杭州府學生年十八陳時政得失太祖悅
之試秋柳賦稱旨吏部奏宏年少賜歸卒業尋以鄉貢歷

教松江

西湖遊覽志

鄭元祐字明德遂昌人家錢塘是時咸淳諸老猶在元祐
徧遊其門質疑稽隱充然有得父歿僑居平江至正丁酉
除平江路儒學教授擢江浙儒學提舉卒元祐兒時傷右
臂比長能左手作楷書規矩備至遂自號尚左生爲文章

滂沛豪宕有古作者風詩亦清峻蒼古晚年自彙其所作

以授謝徽名僑吳集

元詩
選傳

張憲字思廉山陰人負才自放走京師創言天下事衆駭
其狂還入富春山中一日升高望遠呼所親曰亟去三日
逃寇猝至死者五百餘家始悔不用憲言後又變姓名來
杭州寄食報國寺旦暮手一編師事湯維楨維楨曰吾用
三體咏古史樂府不易到唯吾門張憲能之又曰吾門稱
能詩者南北凡百餘人求似憲者不能十人

元詩
選傳

陳基字敬初臨海人九歲與兄聚從師于杭寓觀橋之陋
巷夜雨暴至張蓋就寢不願自扁其軒日三歎讀書不輟

已而受學黃潛遊京師授經筵檢討尋轉江浙行中書省
郎中請葺岳飛墳祠致祭自爲文刻石墓上出官錢補刊
西湖書院經史板洪武初召修元史書成賜金還卒于道
有夷白齋稿二十卷

錢塘縣志

明

楊維楨字廉夫會稽人家鐵崖山下父宏築層樓俾讀書
其上里人謂曰書樓楊泰定四年以春秋登進士第除天
台縣尹元進士授縣尹自維楨始改錢清場鹽司令久不
調偕道士張雨縱遊西湖至正初修遼金宋三史遷江西
儒學提舉道梗不行避地富春山徙錢塘張士誠聞其名

招之不往晚號鐵笛老人或自呼老鐵其詩兀杲自喜不蹈襲前人頗溺于音樂行輒以歌伎隨好汲引人物洪武二年編纂禮樂書遣學士詹同奉幣召之

瞻書亭集

張昱字光弼廬陵人少從虞集得詩法楊鄂勒哲鎮江浙用爲叅謀行樞密院判官張士誠據吳以禮徵之不屈明太祖召至京師問其老曰可閒矣厚賜遣還因自號可閒老人居西湖以詩酒自娛嘗曰吾死埋骨西湖題曰詩人張員外墓足矣後果如其言

西湖志

劉基字伯溫青田人幼穎異元至順間舉進士除高安丞有廉直聲行省辟之謝去起爲江浙儒學副提舉論御史

失職爲臺臣所阻再投劾歸

明史本傳

嘗遊學海寧寓黃灣賈

氏有晚泊海寧州及許村遇雨皇崗途中寄長安章子智

諸詩

舊海寧縣志

宋濂字景濂其先金華之潛溪人至濂乃遷浦江幼英敏

強記就學于聞人夢吉通五經復往從吳萊學已遊柳貫

黃潛之門

明史本傳

寓徑山法師禪侶序銘多出其手

餘杭縣志

唐肅字處敬越州山陰人通經史兼習陰陽醫卜書數少

與上虞謝肅齊名稱會稽二肅至正壬寅舉鄉試張士誠

時爲杭州黃岡書院山長遷嘉興路儒學正誠敗例赴京

以父喪還洪武三年用薦召修禮樂書擢應奉翰林文字

其秋科舉法行爲分考官免歸六年謫佃濠梁卒

明史文苑傳

貝瓊字廷珩號清江崇德人聞楊維禎倡古文于會稽往從焉學大進元季不就有司試往來華亭海昌間生徒雲

集明初應詔入史局預編元史嘗校文浙省稱得人授國

子助教五年以疾辭歸有清江集行世

崇德縣志

瓊初領鄉薦

張士誠據吳避地黃灣累徵不就

舊志

瓊一名闕字廷臣程

慶琬聲文會選貝瓊貝闕竝列據輟耕錄貝闕乃瓊之別

名非兩人也

明詩綜小傳

鄧林字士齊新會人洪武丙子鄉薦授貴縣教諭素嗜學工古文詞嘗謂學詩于陶韋學文于史漢韓柳學書于晉

唐諸名家考績至京大學士楊士奇祭酒李時勉畱史館
修書尋出教南昌被薦遷吏部主事宣德四年以事謫杭
州士人多從之遊所著有退庵集傳于世

廣東
通志

何得舉晉江人洪武初登進士第任海寧令德惠及民任
滿遂占籍海寧後改寧府紀善致政還卜居於雙仁巷終

焉墓在西門外

嘉靖海
寧縣志

夏誠字與誠鄞人徙居仁和勤儉喜施而尤敦于族隣姻
故婚嫁族中孤子女殮葬親友之貧者十餘人歲儉每罄
所積以貸無所責償值大祲饑餓盈途誠盡出所有米以
助官賑正統七年賜璽書羊酒復其家勅有司爲樹門湖

州墅居人自其先已冒官河禁傳之子孫後有覺者陳之
官將悉逮理之誠一言釋千數百家之離析信義著于鄉
爲不善者恒懼誠知鄉以司直稱長子醇亦以義粟輸官

授冠帶

成化舊志

史鑑字明古吳江人爲人志正而直言確而厲于書無所
不讀而尤熟于史好著古衣冠曳履揮塵望之者以爲神

仙嘗與劉僉憲沈石田游寓武林所至爲文寄之

城北雜記

魏驥字仲房蕭山人永樂中以進士副榜授松江訓導常
夜分携茗勞諸生諸生感奮多成就者召修永樂大典書
成用師達薦遷太常博士帝誦曰劉燧節爲御史九年高

帝方授是官不輕予人也歷太常寺少卿正統三年召試
行在吏部左侍郎踰年實授終禮部尚書以老請致仕驥
居官務大體在太常山川壇獲雙白兔圻內生瑞麥皆却
不進在吏部有進士未終制求考功不許致仕家居布衣
糲食嘗戴笠行田間錢塘主簿隸訶之答曰蕭山魏驥也

主簿倉皇謝慰而去

明史本傳

按舊志及錢塘志皆載魏驥以爲錢塘人今考明史傳
及省志選舉皆蕭山人而本傳載有錢塘主簿訶驥事
則驥歸老後嘗寓錢塘矣故列之寓賢卷中

孫一元字太初秦人也善詩有逸才意態超遠往來杭湖

間居南山淨慈寺最久大學士費宏南歸訪一元于南屏
一元卧不起久之出見曰海上碧雲起直接天台赤城大

奇大奇絕不交一語宏益嘆重之

舊志

王守仁字伯安餘姚人娠十四月而生祖母夢神人自雲
中送兒下因名雲五歲不能言異人拊之更名守仁

明史本傳

鄉舉時讀書南屏後擒宸濠忽傳王師已及徐淮遂乘夜
遁發過玉山至杭以宸濠付太監張永稱病西湖淨慈寺
作詩云靈鷲高林暑氣清竺天石壁雨痕晴客來湖上逢
雲起僧住峯頭話月明

錢塘縣志

守仁予告歸越時嘗移居西

湖往來南屏虎跑間

陽明年譜

薛侃字尙謙揭陽人嘉靖間進士具疏有定國本辨人才等語時張璁柄國而夏言新有寵患其偪已思去之適有以侃疏草密示璁璁入言此言所爲將導薛侃上疏不數日疏果上大怒親鞫令引言拷掠無完膚竟不變辭侃爲王守仁門人歸遂築天真精舍祀守仁其中與同志講學精思力踐且爲戒於後曰此講學公所後世王薛子孫世

世無所干預

舊錢塘縣志

諸變字子相餘姚人少負奇氣除兵部主事以簡伉忤大僚謫茶陵南歸居錢塘扁曰梅隱隱居教授執經受業者如雲後倅潮陽丞邵武皆有惠政權過嚴陵濯足灘上溺

死歸葬錢塘石屋山白鶴峯下

錢塘縣志

萬表字民望鄞人父椿寧波衛指揮性篤孝痛父椿早世事母唯謹年十七襲指揮使慷慨尙氣節中武會試擢都指揮督浙運至淮見饑民載道不俟奏報輒發所運米賑之全活無算尋謝事家錢塘倭逼省城布政司游居敬問計乃選少林僧兵二百遣其婿指揮吳懋宣統以出戰焚其巢穴省城獲安起都督同知倭犯蘇松急募兵以進遇於楊涇橋挫其鋒身中流矢猶裹創以戰倭遂遁去表博洽羣書與王畿唐順之講良知之學所著有玩鹿亭稿諸書行世子達甫受業於畿順之居喪盡禮官至廣東恭將

有德政

舊錢塘縣志

秦鳴雷字子豫臨海人嘉靖甲辰進士第一人授修撰累遷禮部右侍郎會長陵神道橋圯巨璫多估值謀謀自潤鳴雷以年月不利爲辭寢其議終禮部尙書癸巳春命駕

武林與尙書張瀚選勝西湖飛觴卜夜

武林耆舊集

吳之龍字雪門歙人生有異資讀書十行並下早歲能詩稍長遊武林遂居錢塘從葛寅講學湖南有英流之目謁選得光祿丞與米友石劉半舫倡和詩迅發老健還隱西湖結竹閣社四方詞人歸之子山濤崇正己卯舉人錢塘縣志黃省曾字勉之吳人博雅工文詞與錢塘田汝成交莫逆

嘉靖中來遊西湖儼居南屏最久自稱五岳山人

舊志

祝時泰閩縣人博雅善詩嘉靖初鄉舉官員外挂冠歸墓

錢塘湖山之勝卜居西湖與沈仕輩結玉岑詩社

錢塘縣志

丁仕卿上虞人寓杭東里坊之社教讀見會城之民憊于

夫宿投牒當路請罷免事下諸司議徼巡員役以不便其

私訐仕卿撓亂成法聽者不察嚴行箠楚桎梏回越者三

矣萬歷二年仕卿仍來杭陳請再下兩邑議咸是之自是

兩役悉除又慮歲久法弛更陳牒督府徐杖樹石垂遠

萬歷

舊志

按仕卿與歸澗陳昱俱載萬歷志詳見義行門

宋登春號海翁趙郡新河人其先世治農饒于資登春少
孤家中落嗜酒慕俠能挽強馳騎通習詩畫至吳會久寓
錢塘以詩以酒以畫與一瓢道人兩相得晚依其兒子耕
于天鷲池之石田又自號鷲池生

浙江通志

張叔維虞山人畫宗董北苑吳仲珪遊跡多在西湖自號
西冷寓客故烟巒出没善得吳越諸山之神詩才清逸尤
工七言絕句程孟陽數稱之爲人孤介自守苟非意氣所
合雖王公貴人黃金白璧浼焉去之以所作青山賣人卽
分散貧交或買舟沽酒挈伴湖山間不畱一錢

西州合譜

莫叔明字公遠長洲人徙居武林好爲詩苦思險詣務出

人所不經道貧困益甚游燕齊及楚反葬于武林自伐石

爲之表曰明詩人莫公遠之墓

浙江通志

按錢塘縣志作莫明今從省志

唐新字仲可蘭陵人工詩愛西湖之勝買一舟居之舟名蓮葉往來烟雲浦墅間絕粒采蓴而食孝廉吳之鯨憂其乏絕爲疏以傳知已約共解囊給之新嘆曰吾寧以口食

爲諸子累哉竟辭謝而歸

舊志

黃尊素號白庵餘姚人開館餘杭授徒甚衆著四書緘八

卷諸生傳鈔之後爲御史劾魏忠賢死詔獄

餘杭縣志

李流芳字長蘅嘉定人萬歷丙午舉南畿鄉薦再上公車

不第天啓壬戌抵近郊聞警賦詩而返遂絕意進取性好
佳山水中歲于武林尤數築室臯亭山下泉石深秀桃李
滿村有雙鬢指天目一勺見西湖之句山僧榜人相與歛
曲軟語間持絹素請乞忻然應之與程孟陽聞子將三嚴
爲石交流芳書法規樞東坡畫出入元人尤好吳仲圭詩

在斜川香山之間

仁和縣志

馮夢正字開之秀水人少就塾暮歸吟諷不輟祖母惜膏
火呵止之引被障窻疏帷燈至旦其勤如此隆慶四年舉
于鄉再試不第祖父母及母相繼卒再喪婦繼娶于仁和
沈氏遂附外家以居萬歷五年會試第一選翰林院庶吉

士與同年生沈懋學屠隆並以文章意氣相豪鄒元標抗
論張居正廷杖遠戍夢正送之郊外執手慷慨歸仰屋直
視面憤赤父流涕曰盍從我乎吾不忍見子流血墀下也
急從其父南歸居正歿乃赴闕除編修十五年京察以浮
躁謫官夢正在史館人或戒之曰翰林官婉婉靚閒如好
弱女子至公卿如傳籛耳夢正曰我則不能如赤腳婢裹
足躡踏行數步便思解去亦欲耐事口噤肺腑槎枒送出
齒頰間我亦無如何也里居十年流連山水如遊閒退士
四方學者輻湊身執經卷朱黃甲乙趨然無意于榮進久
之補廣德州判官量移行人司副進尚寶司丞南京國子

監司業歷遷南京國子監祭酒誘掖獎勵諸生橫經挾策而進蓋自成均教衰博士倚席不講夢正至而俊彥雲集誦聲盈耳士氣歛然一變南曹郎嫉其慢已飛章劾之夢正笑曰此代西湖移文趣我也遂移病去築別舍孤山之麓名其堂曰快雪與四方賢達相周旋凡九年而卒

仁和縣志

董其昌字元宰松江華亭人舉萬歷十七年進士改庶吉士累拜南京禮部尚書卒年八十有三贈太子太傅謚文敏其昌天才俊逸少負重名善書超越諸家始以米芾爲宗後自成一家名聞外國其畫集宋元諸家之長行以已意瀟灑生動非人力所及也四方金石之刻得其制作手

書以爲二絕造請無虛日尺素短札流布人間爭購寶之

明史本傳海昌陳太常子獻號增城慕其昌作書虛衷請益其

昌亦引重之畱連其家者踰數歲得意卽伸紙眞行大小

藏弄于篋笥者甚夥所刻玉烟堂帖數十種行世

陳氏家譜

戴一美字中含本江南歙縣人天啓辛酉拔貢初授河南

鄭州州同改官浙江都司經歷後棄官隱跡薦橋碧蘇齋

藥肆中樓居閉閣踰十年足不下梯死葬臯亭山後嗣守

杭墓以醇謹世其家

春渚記聞

汪挺字無上更字爾陶嘉興人崇正癸未進士

明詩綜小傳工

書法嘗講學大滌山精舍

墓志

國朝

黃宗羲字太冲餘姚人少補仁和諸生父尊素死詔獄刺
血繕疏入京訟寃後徵遺獻以病不行宗羲上下古今穿
穴羣言自天官地志九流百氏之教無不精研學者稱梨
洲先生

武林續
耆舊集

康熙丙辰至海寧講學於北寺中士大夫

胥會諸遺老傳誌多出其手云

海寧
縣志

陳洪綬字章侯諸暨人初從劉宗周講性命之學已而縱
酒狎伎自放客有求畫者雖罄折至恭勿與至酒間召妓
輒自索筆墨小夫稚子無勿應也嘗畱杭州其友召之飲
期於西湖洪綬往遇他舟徑登其席主人徐察之知爲洪

綬也亟稱其畫洪綬大駭曰子與我不相識也拂袖去

曝書

亭集

吳姬適字秉季貴池人負氣誼侃然以經世自命迹跡寧都最後遊杭館汪孝廉北園追憶生平遊歷作詩數十章

與河渚施相秦雲爽善

仁和縣志

黃周星字九烟秣陵人崇正庚辰進士性孤介初授民部郎忤主者退老江湖間貧不能自給康熙癸卯依故人寓海寧西門以詩文羔雁者屢滿有贏金輒分貧士居歲餘

徙家武塘

舊志

陳盟號雪灘四川人天啓壬戌進士自閩南典試回道路

梗塞不能返蜀寓西阜庵工詩

清波小志

胡守乾字清清臨清人父尚英崇禎中仕至宮詹學士而卒守乾外家本杭人母携之居杭十餘年家益用乏賣卜于城東市中得百錢輒下簾事吟咏人不知其貴公子也

城東
襍錄

邱上儀字維貞無錫人自守備都閫歷任參戎守衛海鹽清操自勵後陞贛州總戎以母命不赴隱于黃山東邵灣村躬耕紫雲山麓維貞武人恂恂若文士龍山祝眉老集隱君子十四人計其齒盈千齡目曰千齡社席上成詩維

貞爲擅場云

舊海寧縣志

王崇簡字敬哉順天人官禮部尚書明末同其子熙僑寓

餘杭之環橋村與邑侍御鮑奇謨相倡和有居鮑侍御山

莊詩熙字子雍順治丁亥進士官至大學士諡文靖

餘杭縣志

霍達字魯齊武功人官至左都御史明末避居餘杭和村

曾刻楞嚴諸經行世

餘杭縣志

林嗣環號鐵崖泉州人順治己丑進士仕至海南副使攝

學政愛養士子有政聲歸田後慕武林山水僑居湖上卒

葬西湖之白沙泉

錢唐縣志

雷經字綏山四川井研人舉順治辛卯鄉試仕至衢州守

衢地多山仍歲苦旱經建閘溉田又請減浮糧之爲民困

者具見三衢政略因病乞休耽武林山水寓居水巷

家傳

汪之萼字含章歙人母病刲股肉投藥以進母卽愈嘗寓
婁東父病劇倉猝歸誤入盜艘經夜號泣盜憫其孝舍之
奪其囊篋而去篋有一硯爲父所珍萼乞還盜投之草間

比歸父歿葬南屏山廬墓終身遂歿墓所

兩浙鹽法志

韓詩字聖秋號固庵陝西涇陽籍三原人官兵部職方司
郎中嘗往餘杭石孟山著書兼參禪學有石孟山寺記

餘杭

縣志

王士祿字子底號西樵濟南之新城人舉禮部教授萊州
仕至考功員外郎母訃至慟哭屢仆絕以毀卒雅好爲詩

嘗南遊移棹西湖汗漫忘返著有燃脂集司勳集

施閏章吏部王

君墓碑

施閏章字尚白號愚山宣城人官侍讀辛丑遊西湖有湖

上吟小刻

愚山年譜

姚啓聖字熙止別號憂庵會稽人籍于旗康熙二年癸卯

旗下開科啓聖舉第一授廣東香山知縣初至香山澳門

賊弄兵啓聖計擒之後屢立戰功官至福建總督臺灣平

晉尚書子世職加太子少保

李光地姚少保傳

啓聖常讀書西湖

之靈隱寺後子孫仍隸會稽

閩頌彙編

毛際可字會侯號鶴舫順治戊戌進士授彰德府推官廉

明不阿改固城令再補祥符尋舉博學鴻詞嘗寓居東園

數月不能去

東城雜記

王猷定字于一江西南昌人善古文爲人倜儻自豪寓居

西湖爲文鬱勃如殷雷未發又如崩崖壓樹槎枒盤礴旁

枝得隙突然干霄

浙江通志

太僕止敬子嘗自謂讀書三十年

方悟慚愧二字窮愁著書力追大雅寓昭慶僧舍與漢陽

王世顯先後客死徐林鴻視含歛送其柩大梁周司農爲

輯其遺稿刻行于世

曝書集

王世顯漢陽人順治戊戌進士康熙三年知永嘉縣吏事

精敏去官後畱杭州客死徐林鴻經理其喪送其柩還

曝書

亭集

王啓淑字玉琴山東淄川縣學生有水絃樓集張孝廉元云玉琴博學工詩尤長于樂府嘗南遊武林作西湖三體

詩三百首爲時所稱

山左詩鈔小傳

嵇永仁字畱山錫山人嘗占籍錢唐補諸生尚氣節以經濟自負閩督范承謨延之幕府耿精忠爲逆承謨被害永

仁自經死

彭鵬范忠貞公傳

周世傑字沛甄原籍常州隨父宦遊遂卜居錢唐少穎敏十四補諸生爲文縱橫排宕工詩與王修玉齊名修玉以學勝而傑以才勝嘗謂詩貴自出性情袁不擬劉高不仿

薛何必步趨先民循循規矩也歷試不售貧甚詩益工

錢唐

縣志

戴大受字與可休寧人寄籍錢唐博聞強記而于身心之

學尤切所編纂甚富多與人爲善之意

浙江通志

凌起翔字紫雲歙人客居錢唐初饒于財慷慨任事家遂
中落其弟數十年不歸起翔畜其妻若子授之業蘇州有
老嫗售于旂病甚主遣之索其直起翔爲代訪其子而歸
之王文甫欠稅課百餘金吏榜笞以百數王知起翔名隱
以告起翔卽完納

錢唐縣志

閻若璩字百詩號潛邱太原諸生僑籍淮安應詞科不第

若璩長于考證嘗挾所辨尚書二十五篇廣其文數十卷

游錢塘與毛奇齡往復論難

道古堂集

萬斯大字充宗鄞人高祖表明都督同知葬西湖時展墓至杭遂寓仁和性剛毅不可屈撓父友某以義死葬之南屏遊勲賢祠爲釐正其從祀之人隱居教授篤志窮經尤精於春秋三禮與應撝謙沈佳相辨難不少假借年五十卒於杭有學禮質疑禮記偶箋儀禮商周官辨非學春秋隨筆行於世

舊錢塘縣志

趙璉字博也號蘿村諸暨布衣有蘿村集集中云余少孤

無所倚棲來杭貧乏自守蓋三十餘年矣

武林耆舊續集

毛奇齡字大可蕭山人康熙十七年應制試博學鴻詞科授檢討乞病歸銳意治經覓故居枵然無一書遂卜籍杭州居仁和竹竿巷所著書四百九十三卷

盛唐西河先生傳

朱彝尊字錫鬯號竹垞秀水人少聰慧絕人書過眼覆誦

不遺一字客遊南北必彙載十三經二十一史以自隨已

未舉博學鴻詞授檢討

浙江通志

少時嘗讀書昭慶僧舍晚年

流連湖上與毛奇齡稱西湖二老好事合寫爲圖

蜀山紀聞

嚴我斯字存庵歸安人康熙甲辰一甲第一名進士授修

撰歷官禮部左侍郎致政家居以著述爲娛初家茗上後

築室武林城東

浙江通志

仇兆鰲字滄柱鄞人少讀書杭州乙丑成進士授編修歷
官吏部右侍郎時江督噶禮劾陳鵬年兆鰲自言白其誣
衆論韙之以病乞休歸僦寓吳山之麓

寧波府志

惲壽平原名格字正叔武進人抗志養親工詩畫每至杭
必寓東園高雲閣上又嘗自號東園客有在東園柬毛稚
黃詩風致俊逸可以奪昌谷玉溪之席

城東雜記

邵長蘅一名衡字子湘別自號青門山人武進諸生入太
學弱冠卽以古文雄一時自壯至老足跡半天下尤愛武
林湖山其族兄遠平有別業在西湖每至居之累月常欲
結草廬孤山放鶴亭之側

陳玉璫青門山人傳

汪廷俊字簡臣黟縣人以業鹽寓錢塘會遭閩變道路流離廷俊創捐贖子女務使完聚同舍人有竊其金去者廷俊知之不以言

錢唐縣志

萬經字授一號九沙鄞人父斯大開講杭州故經長於杭少傳父經學又從季父斯同及從兄言貫串史事官翰林院編修歸老武林閉戶纂輯先世遺編工隸書晚年益進著有分隸偶存卒葬西溪

徐本撰傳

方黎如字文輈淳安人康熙丙戌進士豐潤知縣經史淹洽罷官歸寓杭州之薦橋引壘後進與修浙江通志

詞科掌錄

朱襄字贊皇號嘯園無錫人與吳江顧氏卓梁園偶和之

什附刻玉池生集中康熙辛巳來遊西湖寓居東園精舍
與吳焯交二十年所撰易章十二卷歷十九寒暑始脫槁
毛竒齡爲之序朱彝尊列之經義攷錄薰習

傅王露字閔林號玉笈會稽人康熙乙未一甲第三名進
士授編修歸寓宗陽宮前巷宅前有銀杏一本宋時樹也
引同志賦詩其間嘗總裁浙江通志西湖志

南巡擢侍講銜晉春坊庶子主講紫陽書院十餘年以經義訓
後進未嘗稍懈買宅皮市巷顏曰信天書屋渚步遺聞

宋和字介三歙人以買至浙江寓錢塘江上聞友人歌詩
試拈韻輒有警句買既折閱遊吳山購史記讀之六閱月

遂能爲古文韓蔘何焯皆推重之有集數十卷

岸舫齋集

鄭羽達字瀛洲號雪崖慈谿人徙杭州由進士知安縣事降福建鹽大使羽達工算學得西洋之秘傳嘗謂三角八線之法精于勾股勾股可以測平圓而不能盡平圓之變三角八線則盡乎其變矣己丑李文貞策問勾股得其卷遂獲售嘗買宅河渚顏曰北渚草堂蓋渚在北山之北也

武林耆舊續集

錢中樞字秋水常熟縣學生與兄良擇以能詩名有虞山二錢之目無子女適海寧查氏遂依女以居少精于禪著有楞嚴經注八卷

舊海寧縣志

吳煒字覲揚寄籍仁和庚戌進士官工曹有聲晉御史工
科給事出任口北道利弊多所興罷歲凶不請命大吏卽

發粟仕至光祿寺少卿

歙縣志

魯曾煜字啓人會稽人康熙辛丑進士改庶吉士告養親
歸里掌教敷文書院課士有法著有秋厯文鈔三州詩鈔

嘗買西溪高氏山庄爲遊憩之所

家傳

全祖望字紹衣號榭山鄞人少遊杭州薦舉鴻博未試捷
南宮改庶常著書數十種每之會城寓篁菴有在篁菴東
趙誠夫詩以與誠夫叅校水經注譌處下榻小山堂三閱

月

渚步遺聞

齊召南字次風號瓊臺晚號息園天台人雍正己酉副榜
乾隆丙辰試鴻博改庶常吉士仕至禮部右侍郎以病回
籍主敷文書院十一年著水道提綱三十卷史漢功臣侯
第考一卷歷代帝王表十三卷後漢功卿表一卷

道古堂集

華崑字秋岳號新羅山人閩人僑居杭州善人物山水花
鳥草蟲皆能脫去時習而力追古法不求妍媚其寫物尤

佳詩亦古質

續畫徵錄

徐師愈字景韓德清人家貧授徒海寧西鄉以供父母父

病目舐之得愈時稱其孝

海寧州志

鄭世元字亦亭父自姚江徙桐鄉世元寄籍海寧詩豪健

無塵滓尤長咏古作書道古似晉唐間人

海寧州志

陳梓字俯恭餘姚人體究宋元以後諸儒之書渡江求友
澉水吳晞淵硤川張朝晉方講洛閩之學年長於梓幾倍
皆折節引爲畏友所養日粹館硤川數年從遊日衆工詩
古文辭書法參顏平原米襄陽有寓硤草行世

海寧州志

方謂字依輔休寧人以諸生貢成均游杭居義和坊之枝
頭巷與梁文泓桑調元交最善性至孝遵遺命葬父母于
吳縣葦山結草舍于場上食如生時者三年

旌于朝衆人所謂蒿廬孝子者也

桑調元蒿廬孝子傳

馮秉仁字體元山東歷城籍居于杭

家傳乾隆元年舉鄉試

明年第進士改庶吉士授編修翰進經史講義

召見養心殿問疏中所引典故皆條晰以對

天顏霽悅且爲指示文義所未盡者遷侍讀擢浙江道御史巡視北城轉兵科給事中巡視北城如故折獄精當而出以

和平不事刑扑曲直自判

歷城縣志

杭州府志卷一百五終